

古文辭類纂

奏議類上編九

古文辭類纂十九

蘇子瞻代張方平諫用兵書。

臣聞好兵猶好色也。傷生之事。非一。而好色者必死。賊民之事。非一。而好兵者必亡。此理之必然者也。夫惟聖人之兵。皆出於不得已。故其勝也。享安全之福。其不勝也。必無意外之患。後世用兵。皆得已而不已。故其勝也。則變遲而禍大。其不勝也。則變速而禍小。是以聖人不計勝負之功。而深戒用兵之禍。何者。興師十萬。日費千金。內外騷動。殆於道路者。七十萬家。內則府庫空虛。外則百姓窮匱。饑寒逼迫。其後必有盜賊之憂。死傷愁怨。其終必致水旱之報。上則將相擁衆。有跋扈之心。下則士衆久役。有潰叛之志。變故百出。皆由用兵。至於興事首議之人。冥譴尤重。蓋以平民無故。緣兵而死。怨氣充積。必有任其咎者。是以聖人

畏之重之非不得已不敢用也自古人主好動干戈由敗而亡者不可勝數臣今不敢復言請爲陛下言其勝者秦始皇既平六國復事胡越成役之患被於四海雖拓地千里遠過三代而墳土未乾天下怨叛二世被害子嬰被擒滅亡之酷自古所未嘗有也漢武帝承文景富溢之餘首挑匈奴兵連不解遂使侵尋及於諸國歲歲調發所向成功建元之間兵禍始作是時蚩尤旗出長與天等其春戾太子生自是師行三十餘年死者無數及巫蠱事起京師流血僵尸數萬太子父子皆敗班固以爲太子生長於兵與之終始帝雖悔悟自克而殺身之恨已無及矣隋文帝既下江南繼事夷狄煬帝嗣位此心不衰皆能誅滅強國威震萬里然而民怨盜起亡不旋踵唐太宗神武無敵尤善用兵比已破滅突厥高昌吐谷渾等猶且未厭親駕遼

東皆志在立功非不得已而用其後武氏之難唐室陵遲
不絕如綫蓋用兵之禍物理難逃不然太宗仁聖寬厚克
已裕人幾至刑措而一傳之後子孫塗炭此豈爲善之報
也哉由此觀之漢唐用兵于寬仁之後故其勝而僅存秦
隋用兵于殘暴之餘故其勝而遂滅臣每讀書至此未嘗
不掩卷流涕傷其計之過也若使此四君者方其用兵之
初隨卽敗衄惕然戒懼知用兵之難則禍敗之興當不至
此不幸每舉輒勝故使狃于功利慮患不深臣故曰勝則
變遲而禍大不勝則變速而禍小不可不察也昔仁宗皇
帝覆育天下無意於兵將士情偷兵革朽鈍元昊乘間竊
發西鄙延安涇原麟府之間敗者三四所喪動以萬計而
海內晏然兵休事已而民無怨言國無遺患何者天下臣
庶知其無好兵之心天地鬼神諒其有不得已之實故也

今陛下天錫勇智意在富強卽位以來繕甲治兵伺候鄰國羣臣百僚窺見此指多言用兵其始也弼臣執國命者無憂深思遠之心樞臣當國論者無慮害持難之識在臺諫之職者無獻替納忠之議從微至著遂成厲階旣而薛向爲橫山之謀韓絳效深入之計陳升之呂公弼等陰與之協力師徒喪敗財用耗屈較之寶元慶厯之敗不及十

一然而天怒人怨邊兵背叛京師騷然陛下爲之旰食者累月何者用兵之端陛下作之是以吏士無怒敵之意而不直陛下也尙賴祖宗積累之厚皇天保佑之深故使兵出無功感悟聖意然淺見之士方且以敗爲恥力欲求勝以稱上心于是王韶構禍於熙河章惇造釁于橫山熊本發難于渝瀘然此等皆戕賊已降俘纍老弱困弊腹心而取空虛無用之地以爲武功使陛下受此虛名而忽於實

禍勉強砥礪奮於功名故沈起劉彝復發於安南使十餘
萬人暴露瘴毒死者十而五六道路之人斃于輸送貲糧
器械不見敵而盡以爲用兵之意必且少衰而李憲之師
復出于洮州矣今師徒克捷銳氣方盛陛下喜于一勝必
有輕視四夷陵侮敵國之意天意難測臣實畏之且夫戰
勝之後陛下可得而知者凱旋捷奏拜表稱賀赫然耳目
之觀耳至于遠方之民肝腦屠於白刃筋骨絕于餽餉流
離破產鬻賣男女薰眼折臂自經之狀陛下必不得而見
也慈父孝子孤臣寡婦之哭聲陛下必不得而聞也譬猶
屠殺牛羊剝鬻魚鼈以爲膳膳食者甚美死者甚苦使陛
下見其號呼於挺刃之下宛轉于刀几之間雖八珍之美
必將投飭而不忍食而況用人之命以爲耳目之觀乎且
使陛下將卒精強府庫充實如秦漢隋唐之君旣勝之後

禍亂方興尙不可救而況所在將吏罷軟凡庸較之古人
萬萬不逮而數年以來公私窘乏內府累世之積掃地無
餘州郡征稅之儲上供殆盡百官俸廩僅而能繼南郊賞
給久而未辨以此舉動雖有智者無以善其後矣且饑疫
之後所在盜賊遽起京東河北尤不可言若軍事一興橫
斂隨作民窮而無告其勢不爲大盜無以自全邊事方深
內患復起則勝廣之形將在于此老臣所以終夜不寐臨
食而嘆至于慟哭而不能自止也且臣聞之凡舉大事必
順天心天之所向以之舉事必成天之所背以之舉事必
敗蓋天心向背之迹見于災祥豐歉之間今自近歲日食
星變地震山崩水旱癘疫連年不解民死將半天心之向
背可以見矣而陛下方且斷然不顧興事不已譬如人子
得過于父母惟有恭順靜思引咎自責庶幾可解今乃紛

然詰責奴婢恣行箠楚。以此事親未有見救于父母者。故臣願陛下遠覽前世興亡之迹。深察天心向背之理。絕意兵革之事。保疆睦鄰。安靜無爲。固社稷長久之計。上以安二宮朝夕之養。下以濟四方億兆之命。則臣雖老死溝壑。瞑目于地下矣。昔漢祖破滅羣雄。遂有天下。光武百戰百勝。祀漢配天然。至白登被圍。則講和親之議。西域請吏。則出謝絕之言。此二帝者。非不知兵也。蓋經變旣多。則慮患深遠。今陛下深居九重。而輕議討伐。老臣庸懦私竊以爲過矣。然人臣納說于君。因其旣厭而止之。則易爲力。迎其方銳而折之。則難爲功。凡有血氣之倫。皆有好勝之意。方其氣之盛也。雖布衣賤士。有不可奪。自非智識特達度量過人。未有能勇于奮發之中。舍己從人。惟義是聽者也。今陛下盛氣于用武。勢不可回。臣非不知而獻言不已者。誠

見陛下聖德寬大聽納不疑故不敢以衆人好勝之常心
望于陛下且意陛下他日親見用兵之害必將哀痛悔恨
而追咎左右大臣未嘗一言臣亦將老且死見先帝于地
下亦有以藉口矣惟陛下哀而察之

蘇子瞻徐州上皇帝書

按公黃州上文潞公書則此奏具橐而未及上也

茅順甫云此等文字識見筆力並入西漢

臣以庸材備員冊府出守兩郡皆東方要地私竊以爲守
法令治文書赴期會不足以報塞萬一輒伏思念東方之
要務陛下之所宜知者得其一二草具以聞而陛下擇焉
臣前任密州建言自古河北與中原離合常係社稷存亡
而京東之地所以灌輸河北鉗竭則囂恥辱亡則齒寒而
其民喜爲盜賊爲患最甚因爲陛下畫所以待盜賊之策
及移守徐州覽觀山川之形勢察其風俗之所上而考之

於載籍然後又知徐州爲南北之襟要而京東諸郡安危所寄也昔項羽入關旣燒咸陽而東歸則都彭城夫以羽之雄略捨咸陽而取彭城則彭城之險固形便足以得志於諸侯者可知矣臣觀其地三面被山獨其西平川數百里西走梁宋使楚人開關而延敵材官騶發突騎雲縱眞若屋上建瓴水也地宜粟麥一熟而飽數歲其城三面阻水樓堞之下以汴泗爲池獨其南可通車馬而戲馬臺在焉其高十仞廣袤百步若用武之世屯千人其上聚餽木砲石凡戰守之具以與城相表裏而積三年糧於城中雖用十萬人不易取也其民皆長大膽力絕人喜爲剽掠小不適意則有飛揚跋扈之心非止爲盜而已漢高祖沛人也項羽宿遷人也劉裕彭城人也朱全忠碭山人也皆在今徐州數百里間耳其人以此自負凶桀之氣積以成俗

魏太武以三十萬人攻彭城不能下而王智興以卒伍庸材恣睢於徐朝廷亦不能討豈非以其地形便利人卒勇悍故耶州之東北七十餘里卽利國監自古爲鐵官商賈所聚其民富樂凡三十六冶冶戶皆大家藏鏹巨萬常爲盜賊所窺而兵衛寡弱有同兒戲臣中夜以思卽爲寒心使劇賊致死者十餘人白晝入市則守者皆棄而走耳地旣產精鐵而民皆善鍛散冶戶之財以嘯召無賴則烏合之衆數千人之仗可以一夕具也順流南下辰發已至而徐有不守之憂矣不幸而賊有過人之才如呂布劉備之徒得徐而逞其志則京東之安危未可知也近者河北轉運司奏乞禁止利國監鐵不許入河北朝廷從之昔楚人亡弓不能忘楚孔子猶小之況天下一家東北二冶皆爲國興利而奪彼與此不已隘乎自鐵不北行冶戶皆有失

業之憂詣臣而訴者數矣臣欲因此以征冶戶爲利國監之捍屏今三十六冶冶各百餘人採鑛伐炭多饑寒亡命強力鬻忍之民也臣欲使冶戶每冶各擇有材力而忠謹者保任十人籍其名於官授以卻刃刀槩教之擊刺每月兩衙集於知監之庭而閱試之藏其刃於官以待大盜不得役使犯者以違制論冶戶爲盜所擬久矣民皆知之使冶出十人以自衛民所樂也而官人爲除近日之禁使鐵得北行則冶戶皆悅而聽命茲猾破膽而不敢謀矣徐城雖險固而樓櫓敝惡又城大而兵少緩急不可守今戰兵千人耳臣欲乞移南京新招騎射兩指揮於徐此故徐人也膏屯于徐營壘材石旣具矣而遷于南京異時轉運使分東西路畏餽餉之勞而移之西耳今兩路爲一其去來無所損益而足以爲徐之重城下數里頗產精石無窮而

奉化廂軍見闕數百人臣願募石工以足之聽不差出使
此數百人者常採石以甃城數年之後舉爲金湯之固要
使利國監不可窺則徐無事徐無事則京東無虞矣沂州
山谷重阻爲逋逃淵藪盜賊每入徐州界中陛下若採臣
言不以臣爲不肖願復三年守徐且得兼領沂州兵甲巡
檢公事必有以自効京東惡盜多出逃軍逃軍爲盜民則
望風畏之何也技精而法重也技精則難敵法重則致死
其勢然也自陛下置將官修軍政士皆精銳而不免於逃
者臣嘗考其所由蓋自近歲以來部送罪人配軍者皆不
使役人而使禁軍軍士當送部者受牒卽行往返常不下
十日道路之費非取息錢不能辦百姓畏法不敢貸貸亦
不可復得惟所部將校乃敢出息錢與之歸而刻其糧賜
以故上下相持軍政不修博奕飲酒無所不至窮苦無聊

則逃去爲盜臣自至徐卽取不係省錢百餘千別儲之當部送者量遠近裁取以三月刻納不取其息將吏有敢貸息錢者痛以法治之然後嚴軍政禁酒博比暮年士皆飽暖練熟技藝等第爲諸郡之冠陛下遣敕使按閱所具見也臣願下其法諸郡推此行之則軍政修而逃者寡亦去盜之一端也臣聞之漢相王嘉曰孝文帝時二千石長吏安官樂職上下相望莫有苟且之意其後稍稍變易公卿以下轉相促急司隸部刺史發揚陰私吏或居官數月而退二千石益輕賤吏民慢易之知其易危小失意則起離畔之心前山陽亡徒蘇令從橫吏士臨難莫肯仗節死義者以守相威權素奪故也國家有急取辦于二千石二千石尊重難危乃能使下以王嘉之言而考之於今郡守之威權可謂素奪矣上有監司伺其過失下有吏民持其長

短未及按問而差替之命已下矣欲督捕盜賊法外求一錢以使人且不可得盜賊凶人情重而法輕者守臣輒配流之則使所在法司復按其狀劾以失入惴惴如此何以得吏士死力而破姦人之黨乎由此觀之盜賊所以滋熾者以陛下守臣權太輕故也臣願陛下稍重其權責以大綱闊略其小故凡京東多盜之郡自青鄆以降如徐沂齊曹之類皆慎擇守臣聽法外處置強盜頗賜緡錢使得以布設耳目畜養爪牙然緡錢多賜則難常少又不足於用臣以爲每郡可歲別給一二百千使以釀酒凡使人葺捕盜賊得以酒予之敢以爲他用者坐賊論賞格之外歲得酒數百斛亦足以使人矣此又治盜之一術也然此皆其小者其大者非臣之所當言欲默而不發則又私自念遭值陛下英聖特達如此若有所不盡非忠臣之義故昧死

復言之。昔者以詩賦取士。今陛下以經術用人。名雖不同。然皆以文詞進耳。考其所得多。吳楚閩蜀之人。至于京東西河北河東陝西五路。蓋自古豪傑之場。其人沈鷁勇悍。可任以事。然欲使治聲律。讀經義。以與吳楚閩蜀之人爭得失。於毫釐之間。則彼有不仕而已。故其得人常少。夫惟忠孝禮義之士。雖不得志。不失爲君子。若德不足而才有餘者。困于無門。則無所不至矣。故臣願陛下特爲五路之士別開仕進之門。漢法郡縣秀民。推擇爲吏。考行察廉。以次遷補。或至二千石。人爲公卿。古者不專以文詞取人。故得士爲多。黃霸起于卒吏。薛宣奮于書佐。朱邑選于嗇夫。邴吉出于獄吏。其餘名臣循吏。由此而進者。不可勝數。唐自中葉以後。方鎮皆選列校以掌牙兵。是時四方豪傑。不能以科舉自達者。皆爭爲之。往往積功以取旄鉞。雖老姦

巨盜或出其中而名卿賢將如高仙芝封常清李光弼來
瑱李抱玉段秀實之流所得亦已多矣王者之用人如江
河江河所趨百川赴焉蛟龍生之及其去而之他則魚鼈
無所還其體而鰈鰕爲之制今世胥史牙校皆奴僕庸人
者無他以陛下不用也今將用胥史牙校而胥史行文書
治刑獄錢穀其勢不可廢鞭撻鞭撻一行則豪傑不出於
其間故凡士之刑者不可用用者不可刑故臣願陛下採
唐之舊使五路監司郡守共選士人以補牙職皆取人材
心力有足過人而不能從事於科舉者祿之以今之庸錢
而課之鎖稅場務督捕盜賊之類自公罪杖以下聽贖依
將校法使長吏得薦其才者第其功閤書其歲月使得出
仕比任子而不以流外限其所至朝廷察其尤異者擢用
數人則豪傑英偉之士漸出於此塗而姦猾之黨可得而

寵取也其條目委曲臣未敢盡言惟陛下留神省察昔晉武平吳之後詔天下罷軍役州郡悉去武備惟山濤論其不可帝見之曰天下名言也而不能用及永嘉之後盜賊蠭起郡國皆以無武備不能制其言乃驗今臣于無事之時屢以盜賊爲言其私憂過計亦以甚矣陛下縱能容之必爲議者所笑使天下無事而臣獲笑可也不然事至而圖之則已晚矣干犯天威罪在不赦

園丘合祭六議劄子

臣伏見九月二十二日詔書節文俟郊禮畢集官詳議祠皇地祇事及郊祀之歲廟饗典禮聞奏者臣恭覩陛下近者至日親祀郊廟神祇饗答實蒙休應然則園丘合祭允當天地之心不宜復有改更臣竊惟議者欲變祖宗之舊園丘祀天而不祀地不過以謂冬至祀天於南郊陽時陽

位也夏至祀地於北郊陰時陰位也以類求神則陽時陽位不可以求陰也是大不然冬至南郊旣祀上帝則天地百神莫不從也古者秋分夕月於西郊亦可謂陰位矣至於從祀上帝則以冬至而祀月於南郊議者不以爲疑今皇地祇亦從上帝而合祭於圓丘獨以爲不可則過矣書曰肆類于上帝禋于六宗望于山川徧于羣神舜之受禪也自上帝六宗山川羣神莫不畢告而獨不告地祇豈有此理哉武王克商庚戌柴望柴祭上帝也望祭山川也一日之間自上帝而及山川必無南北郊之別也而獨略地祇豈有此理哉臣以知古者祀上帝則并祀地祇矣何以明之詩之序曰昊天有成命郊祀天地也此乃合祭天地經之明文而說者乃以比之豐年秋冬報也曰秋冬各報而皆歌豐年則天地各祀而皆歌昊天有成命也是大不

然豐年之詩曰豐年多黍多稌亦有高廩萬億及秭爲酒
爲醴烝畀祖妣以洽百禮降福孔皆歌於秋可也歌於冬
亦可也昊天有成命之詩曰昊天有成命二后受之成王
不敢康夙夜基命宥密於緝熙單厥心肆其靖之終篇言
天而不及地頌所以告神明也未有歌其所不祭祭其所
不歌也今祭地於北郊歌天而不歌地豈有此理也臣以
此知周之世祀上帝則地祇在焉歌天而不歌地所以尊
上帝故其序曰郊祀天地也春秋書不郊猶三望左氏傳
曰望郊之細也說者曰三望太山河海或曰淮海也又或
曰分野之星及山川也魯諸侯也故郊之細及其分野山
川而已周有天下則郊之細獨不及五嶽四瀆乎嶽瀆猶
得從祀而地祇獨不得合祭乎秦燔詩書經籍散亡學者
各以意推類而已王鄭賈服之流未必皆得其真臣以詩

書春秋考之則天地合祭久矣議者乃謂合祭天地始於
王莽以爲不足法臣竊謂禮當驗其是非不當以人廢光
武皇帝親誅莽者也尙采用元始合祭故事謹按後漢書
郊祀志建武二年初制郊兆於洛陽爲圓壇八陛中又爲
重壇天地位其上皆南鄉西上此則漢世合祭天地之明
驗也又按水經注伊水東北至洛陽縣圓丘東大魏郊天
之所準漢故事爲圓壇八陛中又爲重壇天地位其上此
則魏世合祭天地之明驗也唐睿宗將有事於南郊賈曾
議曰有虞氏禘黃帝而郊嚳夏后氏禘黃帝而郊鯀郊之
與廟皆有禘禘於廟則祖宗合食於太祖禘於郊則地祇
羣望皆合於圓丘以始祖配享蓋有事祭非常祀也三輔
故事祭於圓丘上帝后土位皆南面則漢嘗合祭矣時褚
無量郭山惲等皆以會言爲然明皇天寶元年二月敕曰

凡所祠享必在躬親朕不親祭禮將有關其皇地祇宜如
南郊合祭是月二十日合祭天地于南郊自後有事于圜
丘皆合祭此則唐世合祭天地之明驗也今議者欲冬至
祀天夏至祀地蓋以爲用周禮也臣請言周禮與今禮之
別古者一歲祀天者三明堂饗帝者一四時迎氣者五祭
地者二饗宗廟者四爲此十五者皆天子親祭也而又朝
日夕月四望山川社稷五祀及羣小祀之類亦皆親祭此
周禮也太祖皇帝受天眷命肇造宋室建隆初郊先饗宗
廟並祀天地自眞宗以來三歲一郊必先有事景靈徧饗
太廟乃祀天地此國朝之禮也夫周之禮祭如彼其多而
歲行之不以爲難今之禮親祭如此其少而三歲一行不
以爲易其故何也古者天子出入儀物不繁兵衛甚簡用
財有節而宗廟在大門之內朝諸侯出爵賞必於太廟不

止時祭而已天子所治不過王畿千里唯以齊祭禮樂爲政事能守此則天下服矣是故歲歲行之率以爲常至於後世海內爲一四方萬里皆聽命於上機務之繁億萬倍於古日力有不能給自秦漢以來天子儀物日以滋多有加無損以至於今非復如古之簡易也今所行皆非周禮三年一郊非周禮也先郊二日而告原廟一日而祭太廟非周禮也郊而肆赦非周禮也優賞諸軍非周禮也自后妃以下至文武官皆得蔭補親屬非周禮也自宰相宗室以下至百官皆有賜賚非周禮也此皆不改而獨於地祇則曰周禮不當祭於圜丘此何義也議者必曰今之寒暑與古無異而宣王薄伐玁狁六月出師則夏至之日何爲不可祭乎臣將應之曰舜一歲而巡四嶽五月方暑而南至衡山十一月方寒而北至常山亦今之寒暑也後世人

主能行之乎周所以十二歲一巡者唯不能如舜也夫周已不能行舜之禮而謂今可以行周之禮乎天之寒暑雖同而禮之繁簡則異是以有虞氏之禮夏商有所不能行夏商之禮周有所不能用時不同故也宣王以六月出師驅逐玃狁蓋非得已且吉甫爲將王不親行也今欲定一代之禮爲三歲常行之法豈可以六月出師爲比乎議者必又曰夏至不能行禮則遣官攝祭祀亦有故事此非臣之所知也周禮大宗伯若王不與則攝位鄭氏注曰王有故則代行其祭祀賈公彥疏曰有故謂王有疾及哀慘皆是也然則攝事非安吉之禮也後世人主不能歲歲親祭故命有司行事其所從來久矣若親郊之歲遣官攝事是無故而用有故之禮也議者必又曰省去繁文末節則一歲可以再郊臣將應之曰古者以親郊爲常禮故無繁文

今世以親郊爲大禮則繁文有不能省也若帷城幔屋盛夏則有風雨之虞陛下自宮入廟出郊冠通天乘大輅日中而舍百官衛兵暴露於道鎧甲具裝人馬喘汗皆非夏至所能堪也王者父事天母事地不可偏也事天則備事地則簡是於父母有隆殺也豈得以爲繁文末節而一切欲損去乎國家養兵異於前世自唐之時未有軍賞猶不能歲歲親祠天子出郊兵衛不可簡省大輅一動必有賞給今三年一郊傾竭帑藏猶恐不足郊賚之外豈可復加若一年再賞國力將何以給分而與之人情豈不失望議者必又曰三年一祀天又三年一祀地此又非臣之所知也三年一郊已爲疏闊若獨祭地而不祭天是因事地而愈疏於事天自古未有六年一祀天者如此則典禮愈壞欲復古而背古益遠神祇必不顧饗非所以爲禮也議者

必又曰當郊之歲以十月神州之祭易夏至方澤之祀則
可以免方暑舉事之患此又非臣之所知也夫所以議此
者爲欲舉從周禮也今以十月易夏至以神州代方澤不
知此周禮之經耶抑變禮之權耶若變禮從權而可則合
祭圜丘何獨不可十月親祭地十一月親祭天先地後天
古無是禮而一歲再郊軍國勞費之患尙未免也議者必
又曰當郊之歲以夏至祀地祇於方澤上不親郊而通燔
火天子於禁中望祀此又非臣之所知也書之望秩周禮
之四望春秋之三望皆謂山川在境內而不在四郊者故
遠望而祭也今所在之處俛則見地而云望祭是爲京師
不見地平此六議者合祭可不之決也夫漢之郊禮尤與
古戾唐亦不能如古本朝祖宗欽崇祭祀儒臣禮官講求
損益非不知圜丘方澤皆親祭之爲是也蓋以時不可行

是故參酌古今上合典禮下合時宜較其所得已多於漢唐矣天地宗廟之祭皆當歲徧今不能歲徧是故徧於三年當郊之歲又不能於一歲之中再舉大禮是故徧於三日此皆因時制宜雖聖人復起不能易也今並祀不失親祭而北郊則必不能親往二者就爲重乎若一年再郊而遣官攝事是長不親事地也三年間郊當行郊地之歲而暑雨不可親行遣官攝事則是天地皆不親祭也夫分祀天地決非今世之所能行議者不過欲於當郊之歲祀天地宗廟分而爲三耳分而爲三有三不可夏至之日不可以動大衆舉大禮一也軍賞不可復加二也自有國以來天地宗廟唯饗此祭累聖相承唯用此禮此乃神祇所歆祖宗所安不可輕動動之則有吉凶禍福不可不慮三也凡此三者臣熟計之無一可行之理伏請從舊爲便昔西

漢之衰元帝納貢禹之言毀宗廟成帝用丞相衡之議改郊位皆有殃咎著於史策往鑒甚明可爲寒心伏望陛下詳覽臣此章則知合祭天地乃是古今正禮本非權宜不獨初郊之歲所當施行實爲無窮不刊之典願陛下謹守太祖建隆神宗熙甯之禮無更改易郊祀廟饗以救甯上下神祇仍乞下臣此章付有司集議如有異論卽須盡一解破臣所陳六議使皆屈伏上合周禮下不爲當今軍國之患不可固執更不論當今可與不可施行所貴嚴祀大典以時定取進止

合河蕭氏
刻梓家譜

奏議類上編十

古文辭類纂二十

王介甫上仁宗皇帝言事書。

臣愚不肖蒙恩備使一路今又蒙恩召還闕廷有所任屬而當以使事歸報陛下不自知其無以稱職而敢緣使事之所及冒言天下之事伏惟陛下詳思而擇處其中幸甚竊觀陛下有恭儉之德有聰明睿智之才夙興夜寐無一日之暇聲色狗馬觀游玩好之事無纖介之蔽而仁民愛物之意孚於天下而又公選天下之所願以爲輔相者屬之以事而不貳於讒邪傾巧之臣此雖二帝三王之用心不過如此而已宜其家給人足天下大治而效不至於此顧內則不能無以社稷爲憂外則不能無懼於夷狄天下之財力日以困窮而風俗日以衰壞四方有志之士認認然常恐天下之久不安此其故何也患在不知法度故也

今朝廷法嚴令具無所不有而臣以謂無法度者何哉方
今之法度多不合乎先王之政故也孟子曰有仁心仁聞
而澤不加於百姓者爲政不法於先王之道故也以孟子
之說觀方今之失正在於此而已夫以今之世去先王之
世遠所遭之變所遇之勢不一而欲一一修先王之政雖
甚愚者猶知其難也然臣以謂今之失患在不法先王之
政者以謂當法其意而已夫二帝三王相去蓋千有餘載
一治一亂其盛衰之時具矣其所遭之變所遇之勢亦各
不同其施設之方亦皆殊而其爲天下國家之意本末先
後未嘗不同也臣故曰當法其意而已法其意則吾所改
易更革不至乎傾駭天下之耳目聳天下之口而固已合
乎先王之政矣雖然以方今之世揆之陛下雖欲改易更
革天下之事合於先王之意其勢必不能也陛下有恭儉

之德有聰明睿智之才有仁民愛物之意誠加之意則何爲而不成何欲而不得然而臣願以謂陛下雖欲改易更革天下之事合於先王之意其勢必不能者何也以方今天下之人才不足故也臣嘗試竊觀天下在位之人未有乏于此時者也夫人才乏于上則有沈廢伏匿在下而不爲當時所知者矣臣又求之於閭巷草野之間而亦未見其多焉豈非陶冶而成之者非其道而然乎臣以謂方今在位之人才不足者以臣使事之所及則可知矣今以一路數千里之間能推行朝廷之法令知其所緩急而一切能使民以修其職事者甚少而不才苟簡貪鄙之人至不可勝數其能講先王之意以合當時之變者蓋闔郡之間往往而絕也朝廷每一令下其意雖善在位者猶不能推行使膏澤加於民而吏輒緣之爲姦以擾百姓臣故曰在

位之人才不足而草野閭巷之間亦未見其多也夫人才不足則陛下雖欲改易更革天下之事以合先王之意大臣雖有能當陛下之意而欲領此者九州之大四海之遠孰能稱陛下之指以一二推行此而人人蒙其施者乎臣故曰其勢必未能也孟子曰徒法不能以自行非此之謂乎然則方今之急在於人才而已誠能使天下之才衆多然後在位之才可以擇其人而取足焉在位者得其才矣然後稍視時勢之可否而因人情之患苦變更天下之弊法以趨先王之意甚易也今之天下亦先王之天下先王之時人才嘗衆矣何至于今而獨不足乎故曰陶冶而成之者非其道故也商之時天下嘗大亂矣在位貪毒禍敗皆非其人及文王之起而天下之才嘗少矣當是時文王能陶冶天下之士而使之皆有士君子之才然後隨其才

之所有而官使之詩曰豈弟君子遐不作人此之謂也及其成也微賤免置之人猶莫不好德免置之詩是也又況于在位之人乎夫文王惟能如此故以征則服以守則治詩曰奉璋峨峨髦士攸宜又曰周王于邁六師及之言文王所用文武各得其材而無廢事也及至夷厲之亂天下之才又嘗少矣至宣王之起所與圖天下之事者仲山甫而已故詩人嘆之曰德輶如毛維仲山甫舉之愛莫助之蓋閔人士之少而山甫之無助也宣王能用仲山甫推其類以新美天下之士而後人才復衆於是內修政事外討不庭而復有文武之境土故詩人美之曰薄言采芑于彼新田于此畱畝言宣王能新美天下之士使之有可用之才如農夫新美其田而使之有可采之芑也由此觀之人之才未嘗不自人主陶冶而成之者也所謂人主陶冶而

成之者何也亦教之養之取之任之有其道而已所謂教之道何也古者天子諸侯自國至於鄉黨皆有學博置教導之官而嚴其選朝廷禮樂政刑之事皆在於學士所觀而習者皆先王之法言德行治天下之意其材亦可以爲天下國家之用苟不可以爲天下國家之用則不教也苟可以爲天下國家之用者則無不在於學此教之道也所謂養之之道何也饒之以財約之以禮裁之以法也何謂饒之以財人之情不足於財則貪鄙苟得無所不至先王知其如此故其制祿自庶人之在官者其祿已足以代其耕矣由此等而上之每有加焉使其足以養廉恥而離于貪鄙之行猶以爲未也又推其祿以及其子孫謂之世祿使其生也旣于父母兄弟妻子之養婚姻朋友之接皆無憾矣其死也又于子孫無不足之憂焉何謂約之以

禮人情足于財而無禮以節之則又放僻邪侈無所不至
先王知其如此故爲之制度婚喪祭養燕享之事服食器
用之物皆以命數爲之節而齊之以律度量衡之法其命
可以爲之而財不足以具則弗具也其財可以具而命不
得爲之者不使有銖兩分寸之加焉何謂裁之以法先王
於天下之士教之以道藝矣不帥教則待之以屏棄遠方
終身不齒之法約之以禮矣不循禮則待之以流殺之法
王制曰變衣服者其君流酒誥曰厥或誥曰羣飲汝勿佚
盡執拘以歸於周予其殺夫羣飲變衣服小罪也流殺大
刑也加小罪以大刑先王所以忍而不疑者以爲不如是
不足以一天下之俗而成吾治夫約之以禮裁之以法天
下所以服從無抵冒者又非獨其禁嚴而治察之所能致
也蓋亦以吾至誠懇惻之心力行而爲之倡凡在左右通

貴之人皆順上之欲而服行之有一不帥者法之加必自此始夫上以至誠行之而貴者知避上之所惡矣則天下之不罰而止者衆矣故曰此養之道也所謂取之道者何也先王之取人也必于鄉黨必於庠序使衆人推其所謂賢能書之以告於上而察之誠賢能也然後隨其德之大小才之高下而官使之所謂察之者非專用耳目之聰明而聽私於一人之口也欲審知其德問以行欲審知其才問以言得其言行則試之以事所謂察之者試之以事是也雖堯之用舜不過如此而已又況其下乎若夫九州之大四海之遠萬官億醜之賤所須士夫之才則衆矣有天下者又不可以一一自察之也又不可偏屬於一人而使之於一日二日之間試其能行而進退之也蓋吾已能察其才行之大者以爲大官矣因使之取其類以持久

試之而考其能者以告於上而後以爵命祿秩予之而已
此取之之道也所謂任之之道者何也人之才德高下厚
薄不同其所任有宜有不宜先王知其如此故知農者以
爲后稷知工者以爲共工其德厚而才高者以爲之長德
薄而才下者以爲之佐屬又以久於其職則上狃習而知
其事下服馴而安其教賢者則其功可以至於成不肖者
則其罪可以至于著故久其任而待之以考績之法夫如
此故智能才力之士則得盡其智以赴功而不患其事之
不終其功之不就也偷惰苟且之人雖欲取容於一時而
顧僇辱在其後安敢不勉乎若夫無能之人固知辭避而
去矣居職任事之日久不勝任之罪不可以幸而免故也
彼且不敢冒而知辭避矣尙何有比周讒諂爭進之人乎
取之旣已詳使之旣已當處之旣已久至其任之也又專

焉而不一一以法束縛之而使之得行其意堯舜之所以
理百官而熙衆工者以此而已書曰三載考績三考黜陟
幽明此之謂也然堯舜之時其所黜者則聞之矣蓋四凶
是也其所陟者則皋陶稷契皆終身一官而不徙蓋其所
謂陟者特加之爵命祿賜而已耳此任之之道也夫教之
養之取之任之之道如此而當時人主又能與其大臣悉
其耳目心力至誠惻怛思念而行之此其人臣之所以無
疑而於天下國家之事無所欲爲而不得也方今州縣雖
有學取墻壁具而已非有教導之官長育人才之事也唯
太學有教導之官而亦未嘗嚴其選朝廷禮樂刑政之事
未嘗在於學學者亦漠然自以禮樂刑政爲有司之事而
非己所當知也學者之所教講說章句而已講說章句固
非古者教人之道也近歲乃始教之以課試之文章夫課

試之文章非博誦強學窮日之力則不能及其能工也大則不足以用天下國家小則不足以爲天下國家之用故雖白首於庠序窮日之力以帥上之教乃使之從政則茫然不知其方者皆是也蓋今之教者非特不能成人之才而已又從而困苦毀壞之使不得成材者何也夫人之才成于專而毀于雜故先王之處民才處工於官府處農于畝畝處商賈於肆而處士於庠序使各專其業而不見異物懼異物之足以害其業也所謂士者又非特使之不得見異物而已一示之以先王之道而百家諸子之異說皆屏之而莫敢習者焉今士之所宜學者天下國家之用也今悉使置之不教而教之以課試之文章使其耗精疲神窮日之力以從事於此及其任之以官也則又悉使置之而責之以天下國家之事夫古之人以朝夕專其業於天

下。國。家。之。事。而。猶。才。有。能。有。不。能。今。乃。移。其。精。神。奪。其。日。力。以。朝。夕。從。事。於。無。補。之。學。及。其。任。之。以。事。然。後。卒。然。責。之。以。爲。天。下。國。家。之。用。宜。其。才。之。足。以。有。爲。者。少。矣。臣。故。曰。非。特。不。能。成。人。之。才。又。從。而。困。苦。毀。壞。之。使。不。得。成。材。也。又。有。甚。害。者。先。王。之。時。士。之。所。學。者。文。武。之。道。也。士。之。才。有。可。以。爲。公。卿。大。夫。有。可。以。爲。士。其。才。之。大。小。宜。不。宜。則。有。矣。至。于。武。事。則。隨。其。才。之。大。小。未。有。不。學。者。也。故。其。大。者。居。則。爲。六。官。之。卿。出。則。爲。六。軍。之。將。也。其。次。則。比。閭。族。黨。之。師。亦。皆。卒。伍。師。旅。之。帥。也。故。邊。疆。宿。衛。皆。得。士。大。夫。爲。之。而。小。人。不。得。奸。其。任。今。之。學。者。以。爲。文。武。異。事。吾。知。治。文。事。而。已。至。于。邊。疆。宿。衛。之。任。則。推。而。屬。之。於。卒。伍。往。往。天。下。姦。悍。無。賴。之。人。苟。其。才。行。足。以。自。託。于。鄉。里。者。亦。未。有。肯。去。親。戚。而。從。召。募。也。邊。疆。宿。衛。此。乃。天。下。之。重。

任而人主之所當慎重者也。故古者教士以射御爲急。其他技能則視其人才之所宜而後教之。其才之所不能則不强也。至於射則爲男子之事。人之生有疾則已。苟無疾未有去射而不學者也。在庠序之間固當從事于射也。有賓客之事則以射有祭祀之事則以射。別士之行同能偶則以射於禮樂之事未嘗不寓以射。而射亦未嘗不在于禮樂祭祀之間也。易曰：「弧矢之利以威天下。」先王豈以射爲可以習揖讓之儀而已乎？固以爲射者武事之尤大。而威天下守國家之具也。居則以是習禮樂。出則以是從戰伐。士旣朝夕從事於此而能者衆。則邊疆宿衛之任皆可以擇而取也。夫士嘗學先王之道。其行義嘗見推於鄉黨矣。然後因其才而託之以邊疆宿衛之事。此古之人君所以推干戈以屬之人而無內外之虞也。今乃以夫天下之

重任人主所當至慎之選推而屬之姦悍無賴才行不足自托于鄉里之人此方今所以認認然常抱邊疆之憂而虞宿衛之不足恃以爲安也今孰不知邊疆宿衛之士不足恃以爲安哉顧以爲天下學士以執兵爲恥而亦未有能騎射行陳之事者則非召募之卒伍孰能任其事者乎夫不嚴其教高其選則士之以執兵爲恥而未嘗有能騎射行陳之事固其理也凡此皆教之非其道故也方今制祿大抵皆薄自非朝廷侍從之列食口稍衆未有不兼農商之利而能充其養者也其下州縣之吏一月所得多者錢八九千少者四五千以守選待除守關通之蓋六七年而後得三年之祿計一月所得乃實不能及三四千而已雖廩養之給亦窘于此矣而養生喪死婚姻葬送之事皆當於此夫出中人之上者窮而不失爲君子出中人

之下者雖泰而不失爲小人唯中人不然窮則爲小人泰則爲君子計天下之士出中人之上下者千百而無十一窮而爲小人泰而爲君子者則天下皆是也先王以爲衆不可以力勝也故制行不以己而以中人爲制所以因其欲而利道之以爲中人之所能守則其志可以行于天下而推之後世以今之制祿而欲士之無毀廉恥蓋中人之所不能也故今官大者往往父賂遺營貲產以負貪污之毀官小者販鬻乞丐無所不爲夫士已嘗毀廉恥以負累于世矣則其偷情取容之意起而矜奮自強之心息則職業安得而不弛治道何從而興乎又況委法受賂侵牟百姓者往往而是也此所謂不能饒之以財也婚喪奉養服食器用之物皆無制度以爲之節而天下以奢爲榮以儉爲恥苟其財之可以具則無所爲而不得有司旣不禁而

人又以此爲榮苟其財不足而不能自稱于流俗則其婚
喪之際往往得罪於族人親姻而人以爲恥矣故富者貪
而不知止貧者則強勉其不足以追之此士之所以重困
而廉恥之心毀也凡此所謂不能約之以禮也方今陛下
躬行儉約以率天下此左古通貴之臣所親見然而其閭
門之內奢靡無節犯上之所惡以傷天下之教者有已甚
者矣未聞朝廷有所放絀以示天下昔周之人拘羣飲而
被之以殺刑者以爲酒之末流生害有至於死者衆矣故
重禁其禍之所自生重禁禍之所自生故其施刑極省而
人之抵於禍敗者少矣今朝廷之法所尤重者獨貪吏耳
重禁貪吏而輕奢靡之法此所謂禁其末而弛其本也
陛下
行至弛其本與後段法嚴令具至不能裁之以刑也兩段
當前後互易荆公集見一南宋雕本極多舛錯世亦無佳
本正之蓋世之識者一段補饒財之餘意陛下躬行一段
補約以禮裁以刑之餘意均當在不能裁之以刑也結句

之後而爲刊本舛誤遂無覺其文勢之然

不順者至然而世之識者上仍有脫字

疑議以爲方今官冗而縣官財用已不足以供之

亦蔽於理矣今之入官誠冗矣然而前世置員蓋甚少而

賦祿又如此之薄則財用之所不足蓋亦有說矣吏祿豈

足計哉臣於財利固未嘗學然竊觀前世治財之大略矣

蓋因天下之力以生天下之財取天下之財以供天下之

費自古治世未嘗以不足爲天下之公患也患在治財無

其道耳今天下不見兵革之具而元元安土樂業人致已

力以生天下之財然而公私常以困窮爲患者殆以理財

未得其道而有司不能度世之宜而通其變耳誠能理財

以其道而通其變臣雖愚固知增吏祿不足以傷經費也

方今法嚴令具所以羅天下之士可謂密矣然而亦嘗教

之以道藝而有不帥教之刑以待之乎亦嘗約之以制度

而有不循理之刑以待之乎亦嘗任之以職事而有不任
事之刑以待之乎夫不先教之以道藝誠不可以誅其不
帥教不先約之以制度誠不可以誅其不循理不先任之
以職事誠不可以誅其不任事此三者先王之法所尤急
也今皆不可得誅而薄物細故非害治之急者爲之法禁
月異而歲不同爲吏者至於不可勝記又況能一一避之
而無犯者乎此法令所以玩而不行小人有幸而免者君
子有不幸而及者焉此所謂不能裁之以刑也凡此皆治
之非其道也黜拔治
當作養方今取士強記博誦而略通於文辭
謂之茂才異等賢良方正茂才異等賢良方正者公卿之
選也記不必強誦不必博略通于文辭而又嘗學詩賦則
謂之進士進士之高者亦公卿之選也夫此二科所得之
技能不足以爲公卿不待論而後可知而世之議者乃以

爲吾常以此取天下之士而才之可以爲公卿者常出於此不必法古之取人而後得士也其亦蔽於理矣先王之時盡所以取人之道猶懼賢者之難進而不肖者之雜於其間也今悉廢先王所以取士之道而歐天下之才士悉使爲賢良進士則士之才可以爲公卿者固宜爲賢良進士而賢良進士亦固宜有時而得才之可以爲公卿者也然而不肖者苟能雕蟲篆刻之學以此進至乎公卿才之可以爲公卿者困於無補之學而以此絀死于崑野蓋十八九矣夫古之人有天下者其所以慎擇者公卿而已公卿既得其人因使推其類以聚于朝廷則百司庶物無不得其人也今使不肖之人幸而至乎公卿因得推其類聚之朝廷此朝廷所以多不肖之人而雖有賢智往往困於無助不得行其意也且公卿之不肖旣推其類以聚於朝

廷朝廷之不肖又推其類以備四方之任使四方之任使者又各推其不肖以布于州郡則雖有同罪舉官之科豈足恃哉適足以爲不肖者之資而已其次九經五經學究明法之科朝廷固已嘗患其無用於世而稍責之以大義矣然大義之所得未有以賢於故也今朝廷又開明經之選以進經術之士然明經之所取亦記誦而略通於文辭者則得之矣彼通先王之意而可以施于天下國家之用者顧未必得與于此選也其次則恩澤子弟庠序不教之以道藝官司不考問其才能父兄不保任其行義而朝廷輒以官予之而任之以事武王數紂之罪則曰官人以世夫官人以世而不計其才行此乃紂之所以亂亡之道而治世之所無也又其次曰流外朝廷固已擠之於廉恥之外而限其進取之路矣顧屬之以州縣之事使之臨士民

之上豈所謂以賢治不肖者乎以臣使事之所及一路數千里之間州縣之吏出于流外者往往而有可屬任以事者殆無二三而當防閑其姦者皆是也蓋古者有賢不肖之分而無流品之別故孔子之聖而嘗爲季氏吏蓋雖爲吏而亦不害其爲公卿及後世有流品之別則凡在流外者其所成立固嘗自置于廉恥之外而無高人之意矣夫以近世風俗之流靡自雖士大夫之才勢足以進取而朝廷嘗獎之以禮義者晚節末路往往怵而爲姦況又其素所成立無高人之意而朝廷固已擠之於廉恥之外限其進取者乎其臨人親職放僻邪侈固其理也至於邊疆宿衛之選則臣固已言其失矣凡此皆取之非其道也方今取之旣不以其道至於任之又不問其德之所宜而問其出身之後先不論其才之稱否而論其歷任之多少以文

學進者且使之治財已使之治財矣又轉而使之典獄已使之典獄矣又轉而使之治禮是則一人之身而責之以百官之所能備宜其人才之難爲也夫責人以其所難爲則人之能爲者少矣人之能爲者少則相率而不爲故使之典禮未嘗以不知禮爲憂以今之典禮者未嘗學禮故也使之典獄未嘗以不知獄爲恥以今之典獄者未嘗學獄故也天下之人亦以漸漬于失教被服於成俗見朝廷有所任使非其資序則相議而訕之至于任使之不當其才未嘗有非之者也且在位者數徙則不得久於其官故上不能徃習而知其事下不肯服馴而安其教賢者則其功不可以及於成不肖者則其罪不可以至於著若夫迎新將故之勞緣絕簿書之弊固其害之小者不足悉數也設官大抵皆當久於其任而至于所部者遠所任者重則

尤宜久於其官而後可以責其有爲而方今尤不得久於其官往往數日輒遷之矣取之旣已不詳使之旣已不當處之旣已不久至于任之則又不專而又一一以法束縛之不得行其意臣故知當今在位多非其人稍假借之權而不一一以法束縛之則放恣而無不爲雖然在位非其人而恃法以爲治自古及今未有能治者也卽使在位皆得其人矣而一一以法束縛之不使之得行其意亦自古及今未有能治者也夫取之旣已不詳使之旣已不當處之旣已不久任之又不專而又一一以法束縛之故雖賢者在位能者在職與不肖而無能者殆無以異夫如此故朝廷明知其賢能足以任事苟非其資序則不以任事而輒進之雖進之士猶不服也明知其無能而不肖苟非有罪爲在事者所劾不敢以其不勝任而輒退之雖退之士

猶不服也。彼誠不肖無能，然而士不服者，何也？以所謂賢能者任其事，與不肖而無能者亦無以異。故也。臣前以謂不能任人以職事而無不任事之刑以待之者，蓋謂此也。夫教之養之，取之任之，有一非其道，則足以敗天下之人。才又況兼此四者而有之，則在位不才苟簡貪鄙之人，至於不可勝數，而草野間巷之間亦少可任之才。固不足怪。詩曰：『國雖靡止，或聖或否。』民雖靡盬，或哲或謀，或肅或艾。如彼流泉，無淪胥以敗。此之謂也。夫在位之人才不足矣，而閭巷草野之間亦少可用之才，則豈特行先王之政而不得也？社稷之託，封疆之守，陛下其能久以天幸爲常，而無一旦之憂乎？蓋漢之張角三十六萬同日而起，所在郡國莫能發其謀。唐之黃巢橫行天下，而所至將吏無敢與之抗者。漢唐之所以亡禍自此始。唐旣亡矣，陵夷以至五

代而武夫用事賢者伏匿消沮而不見在位無復有知君
臣之義上下之禮者也當是之時變置社稷蓋甚于奕碁
之易而元元肝腦塗地幸而不轉死於溝壑者無幾耳夫
人才不足其患蓋如此而方今公卿大夫莫肯爲陛下長
慮後顧爲宗廟萬世計臣竊惑之昔晉武帝趣過目前而
不爲子孫長遠之謀當時在位亦皆偷合苟容而風俗蕩
然棄禮義捐法制上下同失莫以爲非有識固知其將必
亂矣而其後果海內大擾中國列于夷狄者二百餘年伏
惟三廟祖宗神靈所以付屬陛下固將爲萬世血食而大
庇元元於無窮也臣願陛下鑒漢唐五代之所以亂亡懲
晉武苟且因循之禍明詔大臣思所以陶成天下之才慮
之以謀計之以數爲之以漸期爲合于當世之變而無負
于先王之意則天下之人才不勝用矣人才不勝用則陛

下何求而不得何欲而不成哉夫慮之以謀計之以數爲之以漸則成天下之才甚易也臣始讀孟子見孟子言王政之易行心則以爲誠然及見與慎子論齊魯之地以爲先王之制國大抵不過百里者以爲今有王者起則凡諸侯之地或千里或五百里皆將損之至于數十百里而後止於是疑孟子雖賢其仁智足以一天下亦安能毋劫之以兵革而使數百千里之強國一旦肯損其地之十八九比于先王之諸侯至其後觀漢武帝用主父偃之策令諸侯王地悉得推恩封其子弟而漢親臨定其號名輒別屬漢於是諸侯王之子弟各有分土而勢強地大者卒以分析弱小然後知慮之以謀計之以數爲之以漸則大者固可使小强者固可使弱而不至乎傾駭變亂敗傷之釁孟子之言不爲過又況今欲改易更革其勢非若孟子所爲

之難也臣故曰慮之以謀計之以數爲之以漸則其爲甚
易也然先王之爲天下不患人之不爲而患人之不能不
患人之不能而患己之不勉何謂不患人之不爲而患人
之不能人之情所願得者善行美名尊爵厚利也而先王
能操之以臨天下之士天下之士有能遵之以治者則悉
以其所願得者以與之士不能則已矣苟能則孰肯舍其
所願得而不自勉以爲才故曰不患人之不爲而患人之
不能何謂不患人之不能而患己之不勉先王之法所以
待人者盡美自非下愚不可移之才未有不能赴也然而
不謀之以至誠惻怛之心力行而先之未有能以至誠惻
怛之心力行而應之者也故曰不患人之不能而患己之
不勉陛下誠有意乎成天下之才則臣願陛下勉之而已
臣又觀朝廷異時欲有所施爲變革其始計利害未嘗熟

也龜按當脫不字

顧有一流俗僥倖之人不悅而非之則遂止而

不敢云法度立則人無獨蒙其幸者故先王之政雖足以利天下而當其承弊壞之後僥倖之時其勑法立制未嘗不艱難也使其勑法立制而天下僥倖之人亦順悅以趨之無有齟齬則先王之法至今存而不廢矣惟其勑法立制之艱難而僥倖之人不肯順悅而趨之故古之人欲有所爲未嘗不先之以征誅而後得其意詩曰是伐是肆是絕是忽四方以無拂此言文王先征誅而後得意于天下也夫先王欲立法度以變衰壞之俗而成人之才雖有征誅之難猶忍而爲之以爲不若是不可以有爲也及至孔子以匹夫游諸侯所至則使其君臣捐所習逆所順強所劣憧憧如也卒困于排逐然孔子亦終不爲之變以爲不如是不可以有爲此其所守蓋與文王同意夫在上之聖

人莫如文王在下之聖人莫如孔子而欲有所施爲變革則其事蓋如此矣今有天下之勢居先王之位初立法制非有征誅之難也雖有僥倖之人不悅而非之固不勝天下順悅之人衆也然而一有流俗僥倖不悅之言則遂止而不敢爲者惑也陛下誠有意乎成天下之才則臣又願斷之而已夫慮之以謀計之以數爲之以漸而又勉之以成斷之以果然而猶不能成天下之才則以臣所聞蓋未有也然臣之所稱流俗之所不講而今之議者以謂迂闊而熟爛者也竊觀近世士大夫所欲悉心力耳目以補助朝廷者有矣彼其意非一切利害則以爲當世所能行者士大夫旣以此希世而朝廷所取於天下之士亦不過如此至于大倫大法禮義之際先王之所力學而守者蓋不及也一有及此則羣聚而笑之以爲迂闊今朝廷悉心于

一切之利害有司法令

脫字

於刀筆之間非一日也然其效

可觀矣則夫所謂迂闊而熟爛者惟陛下亦可以少畱神而察之矣昔唐太宗正觀之初人人異論如封德彝之徒皆以爲非雜用秦漢之政不足以爲天下能思先王之事開太宗者魏文正公一人爾其所施設雖未能盡當先王之意抑其大略可謂合矣故能以數年之間而天下幾致刑措中國安甯蠻夷順服自三王以來未有如此盛時也唐太宗之初天下之俗猶今之世也魏文正公之言固當時所謂迂闊而熟爛者也然其效如此賈誼曰今或言德教之不如法令胡不引商周秦漢以觀之然則唐太宗之事亦足以觀矣臣幸以職事歸報陛下不自知駑下無以稱職而敢及國家之大體者以臣蒙陛下任使而當歸報竊謂在位之人才不足而無所稱朝廷任使之意而朝廷

所以任使天下之士者或非其理而士不得盡其才此亦臣使事之所及而陛下之所宜先聞者也釋此不言而毛舉利害之一二以汚陛下之聰明而終無補於世則非臣所以事陛下惓惓之意也伏惟陛下詳思而擇其中天下幸甚

王介甫本朝百年無事劄子。

臣前蒙陛下問及本朝所以享國百年天下無事之故臣以淺陋誤承聖問迫於日晷不敢久留語不及悉遂辭而退竊惟念聖問及此天下之福而臣遂無一言之獻非近臣所以事君之義故敢冒昧而粗有所陳伏惟太祖躬上智獨見之明而周知人物之情僞指揮付託必盡其材變置設施必當其務故能駕馭將帥訓齊士卒外以扞夷狄內以平中國於是除苛賦止虐刑廢強橫之藩鎮誅貪殘

之官吏躬以簡儉爲天下先其於出政發令之間一以安
利元元爲事太宗承之以聰武真宗守之以謙仁以至仁
宗英宗無有逸德此所以享國百年而天下無事也仁宗
在位歷年最久臣於時實備從官施爲本末臣所親見嘗
試爲陛下陳其一二而陛下詳擇其可亦足以申鑒於方
今伏惟仁宗之爲君也仰畏天俯畏人寬仁恭儉出于自
然而忠恕誠懇終始如一未嘗妄興一役未嘗妄殺一人
斷獄務在生之而特惡吏之殘擾甯屈己棄財於夷狄而
終不忍加兵刑平而公賞重而信納用諫官御史公聽並
觀而不蔽於偏至之譏因任衆人耳目拔舉疎遠而隨之
以相坐之法蓋監司之吏以至州縣無敢暴虐殘酷擅有
調發以傷百姓自夏人順服蠻夷遂無大變邊人父子夫
婦得免於兵死而中國之人安逸蕃息以至今日者未嘗

妄興一役未嘗妄殺一人斷獄務在生之而特惡吏之殘
擾甯屈已棄財於夷狄而不忍加兵之效也大臣貴戚左
右近習莫敢強橫犯法其自重慎或甚於閭巷之人此刑
平而公之效也募天下驍雄橫猾以爲兵幾至百萬非有
良將以御之而謀變者輒敗聚天下財物雖有文籍委之
府史非有能吏以鈎考而斷盜者輒發凶年饑歲流者填
道死者相枕而寇攘者輒得此賞重而信之效也大臣貴
戚左右近習莫能大擅威福廣私貨賂一有姦慝隨輒上
聞貪邪橫猾雖間或見用未嘗得久此納用諫官御史公
聽並觀而不蔽於偏至之讒之效也自縣令京官以至監
司臺閣升擢之任雖不皆得人然一時之所謂才士亦罕
蔽塞而不見收舉者此因任衆人之耳目拔舉疎遠而隨
之以相坐之法之效也升遐之日天下號慟如喪考妣此

寬仁恭儉出於自然忠恕誠懇終始如一之效也然本朝
累世因循末俗之弊而無親友羣臣之議人君朝夕與處
不過宦官女子出而視事又不過有司之細故未嘗如古
大有爲之君與學士大夫討論先王之法以措之天下也
一切因任自然之理勢而精神之運有所不加名實之間
有所不察君子非不見貴然小人亦得廁其間正論非不
見容然邪說亦有時而用以詩賦記誦求天下之士而無
學校養民之法以科名資歷敘朝廷之位而無官司課試
之方監司無檢察之人守將非選擇之吏轉徙之亟旣難
於考績而遊談之衆因得以亂真交私養望者多得顯官
獨立營職者或見排沮故上下偷惰取容而已雖有能者
在職亦無以異於庸人農民壞於繇役而未嘗特見救恤
又不爲之設官以修其水土之利兵士雜於疲老而未嘗

申。敕。訓。練。又。不。爲。之。擇。將。而。久。其。疆。場。之。權。宿。衛。則。聚。卒。
伍。無。賴。之。人。而。未。有。以。變。五。代。姑。息。羈。縻。之。俗。宗。室。則。無。
教。訓。選。舉。之。實。而。未。有。以。合。先。王。親。疏。隆。殺。之。宜。其。於。理。
財。大。抵。無。法。故。雖。儉。約。而。民。不。富。雖。憂。勤。而。國。不。強。賴。非。
夷。狄。昌。熾。之。時。又。無。堯。湯。水。旱。之。變。故。天。下。無。事。過。於。百。
年。雖。曰。人。事。亦。天。助。也。蓋。累。聖。相。繼。仰。畏。天。俯。畏。人。寬。仁。
恭。儉。忠。恕。誠。慤。此。其。所。以。獲。天。助。也。伏。惟。陛。下。躬。上。聖。之。
質。承。無。窮。之。緒。知。天。助。之。不。可。常。恃。知。人。事。之。不。可。怠。終。
則。大。有。爲。之。時。正。在。今。日。臣。不。敢。輒。廢。將。明。之。義。而。苟。逃。
諱。忌。之。誅。伏。惟。陛。下。幸。赦。而。畱。神。則。天。下。之。福。也。取。進。止。
王。介。甫。進。戒。疏。

臣某昧死再拜上疏皇帝陛下臣竊以爲陛下旣終亮陰
考之於經則羣臣進戒之時而臣待罪近司職當先事有

言者也竊聞孔子論爲邦先放鄭聲而後曰遠佞人仲虺稱湯之德先不邇聲色不殖貨利而後曰用人惟己蓋以謂不淫耳目於聲色玩好之物然後能精於用志能精於用志然後能明於見理能明於見理然後能知人能知人然後佞人可得而遠忠臣良士與有道之君子類進於時有以自竭則法度之行風俗之成甚易也若夫人主雖有過人之材而不能早自戒於耳目之欲至於過差以亂其心之所思則用志不精用志不精則見理不明見理不明則邪說誠行必窺間乘殆而作則其至于危亂也豈難哉伏惟陛下卽位以來未有聲色玩好之過聞於外然孔子聖人之盛尙自以爲七十而後敢縱心所欲也今陛下以鼎盛之春秋而享天下之大奉所以惑移耳目者爲不少矣則臣之所豫慮而陛下之所深戒宜在於此天之生聖

人之材甚吝而人之值聖人之時甚難天旣以聖人之材付陛下則人亦將望聖人之澤於此時伏惟陛下自愛以成德而自強以赴功使後世不失聖人之名而天下皆蒙陛下之澤則豈非可願之事哉臣愚不勝惓惓惟陛下恕其狂妄而幸賜省察

合河蕭氏
刻梓家訓

奏議類下編一

古文辭類纂二十一

董仲舒賢良策對一

制曰朕獲承至尊休德傳之亡窮而施之罔極任大而守重是以夙夜不皇康甯永惟萬事之統猶懼有闕故廣延四方之豪雋郡國諸侯公選賢良脩潔博習之士欲聞大道之要至論之極今子大夫褒然爲舉首朕甚嘉之子大夫其精心致思朕垂聽而問焉蓋聞五帝三王之道改制作樂而天下洽和百王同之常虞氏之樂莫盛於韶於周莫盛於勺聖王已沒鍾鼓箎絃之聲未衰而大道微缺陵夷至虐桀紂之行王道大壞矣夫五百年之間守文之君當塗之士欲則先王之法以戴翼其世者甚衆然猶不能反日日月仆滅至後王而後止豈其所持操或諄繆而失其統與固天降命不可復反必推之於大衰而後息與烏虘

文三十一
凡所爲屑屑夙興夜寐務法上古者又將無補與三代受命其符安在災異之變何緣而起性命之情或夭或壽或仁或鄙習聞其號未燭厥理伊欲風流而令行刑輕而姦改百姓和樂政事宣昭何飭而膏露降百穀登惠潤四海澤臻山木三光全寒暑平受天之祐享鬼神之靈惠澤洋溢施庠方外延及羣生子大夫明先聖之業習俗化之變終始之序講聞高誼之日久矣其明旨諭朕科別其條勿猥勿并取之於術慎其所出迺其不正不直不忠不極枉于執事書之不泄興于朕躬毋悼後害子大夫其盡心靡有所隱朕將親覽焉

仲舒對曰陛下發德音下明詔求天命與情性皆非愚臣之所能及也臣謹案春秋之中視前世已行之事曰觀天
人相與之際甚可畏也國家將有失道之敗而天迺先出

災害已譴告之不知自省又出怪異已警懼之尙不知變而傷敗迺至已此見天心之仁愛人君而欲止其亂也自非大亡道之世者天盡欲扶持而全安之事在彊勉而已矣彊勉學問則聞見博而知益明彊勉行道則德日起而大有功此皆可使還至而立有效者也

以策之次第當先要故從非天降命不可反意說起以勉強行道對風興夜寐非無補以警勸之下乃從行道引入作樂科條不并而貫通

詩曰夙夜匪解書云茂哉茂哉皆彊勉之謂也道者所繇適於治之路也仁義禮樂皆其具也故聖王已沒而子孫長久安甯數百歲此皆禮樂教化之功也王者未作樂之時迺用先王之樂宜於世者而曰深入教化於民教化之情不得雅頌之樂不成故王者功成作樂樂其德也樂者所以變民風化民俗也其變民也易其化人也著故聲發於和而本於情接於肌膚臧於骨髓故王道雖微缺

而箎絃之聲未衰也夫虞氏之不爲政久矣然而樂頌遺風猶有存者是曰孔子在魯而聞韶也夫人君莫不欲安存而惡危亡然而政亂國危者甚衆所任者非其人而所繇者非其道是曰政曰曰仆滅也夫周道衰於幽厲非道亡也幽厲不繇也至於宣王思昔先王之德興滯補弊明文武之功業周道粲然復興詩人美之而作上天祐之爲生賢佐後世稱誦至今不絕此夙夜不解行善之所至也孔子曰人能宏道非道宏人也故治亂廢興在於己非天降命不可得反其所操持諄謬失其統也臣聞天之所大奉使之王者必有非人力所能致而自至者此受命之符也天下之人同心歸之若歸父母故天瑞應誠而至書曰白魚入于王舟有火復于王屋流爲烏此蓋受命之符也周公曰復哉復哉孔子曰德不孤必有鄰皆積善繫德之

效也及至後世淫佚衰微不能統理羣生諸侯背畔殘賊
良民呂爭壤土廢德教而任刑罰刑罰不中則生邪氣邪
氣積於下怨惡畜於上上下下不和則陰陽繆繆而妖孽生
矣此災異所緣而起也臣聞命者天之令也性者生之質
也情者人之欲也或夭或壽或仁或鄙陶冶而成之不能
粹美有治亂之所生故不齊也孔子曰君子之德風也小
人之德土也土上之風必偃故堯舜行德則民仁壽桀紂
行暴則民鄙夭夫上之化下下之從上猶泥之在鈞唯甄
者之所爲猶金之在鎔唯冶者之所鑄綏之斯傑動之斯
和此之謂也臣謹案春秋之文求王道之端得之於正正
次王王次春春者天之所爲也正者王之所爲也其意曰
上承天之所爲而下呂正其所爲正王道之端云爾然則
王者欲有所爲宜求其端於天

此段專對何修何
飭至篇末皆一意

天道之

大者在陰陽陽爲德陰爲刑刑主殺而德主生是故陽常居大夏而呂生育養長爲事陰常居大冬而積於空虛不用之處呂此見天之任德不任刑也天使陽出布施於上而主歲功使陰入伏於下而時出佐陽陽不得陰之助亦不能獨成歲終陽呂成歲爲名此天意也王者承天意呂從事故任德教而不任刑刑者不可任呂治世猶陰之不可任呂成歲也爲政而任刑不順於天故先王莫之有爲也今廢先王德教之官而獨任執法之吏治民毋迺任刑之意與孔子曰不教而誅謂之虐虐政用於下而欲德教之被四海故難成也臣謹案春秋謂一元之意一者萬物之所從始也元者辭之所謂大也謂一爲元者視大始而欲正本也春秋深探其本而反自貴者始故爲人君者正心呂正朝廷正朝廷呂正百官正百官呂正萬民正萬民

呂正四方四方正遠近莫敢不壹於正而亡有邪氣奸其

間者策問內不正不直一層董子所不對而寓意于此謂人君正己固無取以察之爲明也是曰陰

陽調而風雨時羣生和而萬民殖五穀熟而少木茂天地

之間被潤澤而大豐美四海之內聞盛德而皆徠臣諸福

之物可致之祥莫不畢至而王道終矣孔子曰鳳鳥不至

河不出圖吾已矣夫自悲可至此物而身卑賤不得致也

今陛下貴爲天子富有四海居得致之位操可致之勢又

有能致之資行高而恩厚知明而意美愛民而好士可謂

誼主矣然而天地未應而美祥莫至者何也凡曰教化不

立而萬民不正也上段言人君正心以正朝廷德也下段皆言教也所當修飾二者而已而以福

祥可致間其中不截然分兩段固是古人文字變化多有如此而德教相因亦非兩事也夫萬民之從

利也如水之走下不曰教化隄防之不能止也是故教化

立而姦邪皆正者其隄防完也教化廢而姦邪並出刑罰

不能勝者其隄防壞也古之王者明於此是故南面而治天下莫不曰教化爲大務立大學曰教於國設庠序以化於邑漸民曰仁摩民曰誼節民曰禮故其刑罰甚輕而禁不犯者教化行而習俗美也聖王之繼亂世也埽除其迹而悉去之復脩教化而崇起之教化已明習俗已成子孫循之行五六百歲尙未敗也至周之末世大爲亡道曰失天下秦繼其後獨不能改又益甚之重禁文學不得挾書棄捐禮誼而惡聞之其心欲盡滅先聖之道而顓爲自恣苟簡之治故立爲天子十四歲而國破亡矣自古曰徠未嘗有呂亂濟亂大敗天下之民如秦者也其遺毒餘烈至今未滅使習俗薄惡人民嚚頑抵冒殊扞孰爛如此之甚者也孔子曰腐朽之木不可彫也糞土之牆不可圻也今漢繼秦之後如朽木糞牆矣雖欲善治之亡可奈何法出

而姦生令下而詐起如呂湯止沸抱薪救火愈甚亡益也
竊譬之琴瑟不調甚者必解而更張之迺可鼓也爲政而
不行甚者必變而更化之迺可理也當更張而不更張雖
有良工不能善調也當更化而不更化雖有大賢不能善
治也故漢得天下呂來常欲善治而至今不可善治者失
之於當更化而不更化也古人有言曰臨淵羨魚不如退
而結網今臨政而願治七十餘歲矣不如退而更化更化
則可善治善治則災害日去福祿日來詩云宜民宜人受
祿于天爲政而宜於民者固當受祿于天夫仁誼禮知信
五常之道王者所當脩飭也五者脩飭故受天之祐而享
鬼神之靈德施于方外延及羣生也

董仲舒賢良策對二

制曰蓋聞虞舜之時游於巖廊之上垂拱無爲而天下太

平周文王至於日昃不暇食而宇內亦治夫帝王之道豈
不同條共貫與何逸勞之殊也蓋儉者不造立黃旌旗之
飾及至周室設兩觀乘大路朱干玉戚八佾陳于庭而頌
聲興夫帝王之道豈異指哉或曰良玉不琢又云非文亡
呂輔德二端異焉殷人執五刑呂督姦傷肌膚呂懲惡成
康不式四十餘年天下不犯囹圄空虛秦國用之死者甚
衆刑者相望耗矣哀哉烏虜朕夙寤晨興惟前帝王之憲
永思所呂奉至尊章洪業皆在力本任賢今朕親耕藉田
呂爲農先勸孝弟崇有德使者冠蓋相望問勤勞恤孤獨
盡思極神功烈休德未始云獲也今陰陽錯繆氛氣充塞
羣生寡遂黎民未濟廉恥貿亂賢不肖渾殽未得其真故
詳延特起之士意庶幾乎今予大夫待詔百有餘人或道
世務而未濟稽諸上古而不同考之于今而難行毋迺牽

於文繫而不得騁歟將所繇異術所聞殊方與各悉對著
于篇毋諱有司明其指略切磋商究之曰稱朕意

仲舒對曰臣聞堯受命曰天下爲憂而未曰位爲樂也故
誅逐亂臣務求賢聖是曰得舜禹稷禹咎繇衆聖輔德賢
能佐職教化大行天下和洽萬民皆安仁樂誼各得其宜
動作應禮從容中道故孔子曰如有王者必世而後仁此
之謂也堯在位七十載迺遜于位曰禪虞舜堯崩天下不
歸堯子丹朱而歸舜舜知不可辟迺即天子之位曰禹爲
相因堯之輔佐繼其統業是曰垂拱無爲而天下治孔子
曰韶盡美矣又盡善也此之謂也至於殷紂逆天暴物殺
戮賢知殘賊百姓伯夷太公皆當世賢者隱處而不爲臣
守職之人皆奔走逃亡入于海天下耗亂萬民不安故天
下去殷而從周文王順天理物師用賢聖是曰閔天大顛

散宜生等亦聚於朝廷愛施兆民天下歸之故太公起海濱而卽三公也當此之時紂尙在上尊卑昏亂百姓散亡故文王悼痛而欲安之是曰日昃而不暇食也孔子作春秋先正王而繫萬事見素王之文焉繇此觀之帝王之條貫同然而勞逸異者所遇之時異也孔子曰武盡美矣未盡善也此之謂也臣聞制度文采玄黃之飾所曰明尊卑異貴賤而勸有德也故春秋受命所先制者改正朔易服色所曰應天也然則宮室旌旗之制有法而然者也故孔子曰奢則不遜儉則固儉非聖人之中制也臣聞良玉不琢資質潤美不待刻琢此亡異於達巷黨人不學而自知也然則常玉不琢不成文章君子不學不成其德臣聞聖王之治天下也少則習之學長則材諸位爵祿曰養其德刑罰曰威其惡故民曉於禮誼而恥犯其上武王行大誼

平殘賊周公作禮樂呂文之至於成康之隆圉圉空虛四十餘年此亦教化之漸而仁誼之流非獨傷肌膚之效也至秦則不然師申商之法行韓非之說憎帝王之道呂貪狠爲俗非有文德呂教訓於天下也誅名而不察實爲善者不必免而犯惡者未必刑也是呂百官皆飾空言虛辭而不顧實外有事君之禮內有背上之心造僞飾詐趨利無恥又好用憎酷之吏賦斂亡度竭民財力百姓散亡不得從耕織之業羣盜並起是呂刑者甚衆死者相望而姦不息俗化使然也故孔子曰導之呂政叁之呂刑民免而無恥此之謂也今陛下并有天下海內莫不率服廣覽兼聽極羣下之知盡天下之美至德昭然施於方外夜郎康居殊方萬里說德歸誼此太平之致也然而功不加於百姓者殆王心未加焉曾子曰尊其所聞則高明矣行其所

知則光大矣高明光大不在於它在乎加之意而已願陛下因用所聞設誠於內而致行之則三王何異哉陛下親耕藉田曰爲農先夙寤晨興憂勞萬民思惟往古而務曰求賢此亦堯舜之用心也然而未云獲者士素不厲也此亦應前篇設誠於內德也厲士求賢長吏教也從賢長吏內又推出選郎吏之法及官不計日月兩層亦如介甫上仁宗皇帝書綱中有目目中有細目但漢人文法自渾古耳夫不素養士而欲求賢譬猶不琢玉而求文采也故養士之大者莫大庠太學太學者賢士之所關也教化之本原也今曰一郡一國之衆對亡應書者是王道往往而絕也臣願陛下興太學置明師曰養天下之士數考問曰盡其材則英俊宜可得矣今之郡守縣令民之師帥所使承流而宣化也故師帥不賢則主德不宣恩澤不流今吏旣亡教訓於下或不承用主上之法暴虐百姓與姦爲市貧窮孤弱冤苦失職甚不稱陛下

下之意是曰陰陽錯繆氣氣充塞羣生寡遂黎民未濟皆

長吏不明使至於此也夫長吏多出於郎中中郎吏二千

石子弟選郎吏又曰富訾未必賢也按郎中比三百石蓋出爲令中郎比六百

石蓋出爲守其選此者以吏二千石子弟及富訾二途漢初制蓋如此若袁盎以兄噲任爲郎中是吏二千石子弟

也張釋之司馬相如皆以貴爲郎惟馮唐以孝著爲郎中署長意其比甚少故董子云未必賢也自元光九年舉孝

廉元朔五年子博士弟子嗣後郎選乃出此二途班固所云總禮官之甲科羣百郡之廉孝其原自董子奏之此固

郎選之盛矣然漢初所云以貴爲郎者實奠十以上得就選耳去取猶決於上有市籍者猶不得官及武帝元鼎以

後株送徒入財得補郎則市僧以財賂自操仕且古所謂進之權矣是郎選之盛衰皆當武帝之世也

功者曰任官稱職爲差非所謂積日衆久也故小材雖衆

日不離於小官賢材雖未久不害爲輔佐是曰有司竭力

盡知務治其業而曰赴功今則不然累日曰取貴積久曰

致官是曰廉恥貿亂賢不肖渾殽未得其真臣愚曰爲使

諸列侯郡守二千石各擇其吏民之賢者歲貢各二人曰

給宿衛且曰觀大臣之能所貢賢者有賞所貢不肖者有罰夫如是諸侯吏二千石皆盡心於求賢天下之士可得而官使也徧得天下之賢人則三王之盛易爲而堯舜之名可及也毋曰日月爲功實試賢能爲上量材而授官錄德而定位則廉恥殊路賢不肖異處矣陛下加惠寬臣之罪令勿牽制於文使得切磋究之臣敢不盡愚

董仲舒賢良策對三

制曰蓋聞善言天者必有徵於人善言古者必有驗於今故朕垂問乎天人之應上嘉唐虞下悼桀紂寢微寢滅寢明寢昌之道虛心曰改今子大夫明於陰陽所曰造化習於先聖之道業然而文采未極豈惑虜當世之務哉條貫靡竟統紀未終意朕之不明與聽若眩與夫三王之教所祖不同而皆有失或謂久而不易者道也意豈異哉今子

大夫既已著大道之極陳治亂之端矣其悉之究之孰之復之詩不云嗟爾君子毋常安息神之聽之介爾景福朕將親覽焉子大夫其茂明之

前兩策問徧問諸賢良此策蓋獨問董子故策首謝

此意

仲舒復對曰臣聞論語曰有始有卒者其唯聖人乎今陛下幸加惠畱聽於承學之臣復下明冊已切其意而究盡聖德非愚臣之所能具也前所上對條貫靡竟統紀不終辭不別白指不分明此臣淺陋之罪也冊曰善言天者必有徵於人善言古者必有驗於今臣聞天者羣物之祖也故徧覆包函而無所殊建日月風雨已和之經陰陽寒暑已成之故聖人法天而立道亦溥愛而亡私布德施仁已厚之設誼立禮已導之春者天之所已生也仁者君之所已愛也夏者天之所已長也德者君之所已養也霜者天

之所曰殺也刑者君之所曰罰也繇此言之天人之徵古今之道也孔子作春秋上揆之天道下質諸人情參之於古考之於今故春秋之所譏災害之所加也春秋之所惡怪異之所施也書邦家之過兼災異之變曰此見人之所爲其美惡之極迺與天地流通而往來相應此亦言天之一端也古者脩教訓之官務曰惠善化民民已大化之後天下常亡一人之獄矣今世廢而不脩亡曰化民民曰故棄行誼而死財吏是曰犯法而罪多一歲之獄曰萬千數曰此見古之不可不用也故春秋變古則譏之天令之謂命命非聖人不行質樸之謂性性非教化不成人欲之謂情情非度制不節是故王者上謹於承天意曰順命也下務明教化民曰成性也正法度之宜別上下之序曰防欲也脩此三者而大本舉矣人受命於天固超然異於羣生

入有父子兄弟之親出有君臣上下之誼會聚相遇則有
耆老長幼之施粲然有文曰相接驩然有恩曰相愛此人
之所曰貴也生五穀曰食之桑麻曰衣之六畜曰養之服
牛乘馬圉豹檻虎是其得天之靈貴於物也故孔子曰天
地之性人爲貴明於天性知自貴於物知自貴於物然後
知仁誼知仁誼然後重禮節重禮節然後安處善安處善
然後樂循理樂循理然後謂之君子故孔子曰不知命亡
曰爲君子此之謂也冊曰上嘉唐虞下悼桀紂寢微寢滅
寢明寢昌之道虚心曰改臣聞衆少成多積小致鉅故聖
人莫不曰晦致明曰微致顯是曰堯發於諸侯舜興虐深
山非一日而顯也蓋有漸曰致之矣言出於己不可塞也
行發於身不可掩也言行治之大者君子之所曰動天地
也故盡小者大慎微者著詩云惟此文王小心翼翼故堯

兢兢日行其道而舜業業日致其孝善積而名顯德章而身尊此其寢明寢昌之道也積善在身猶長日加益而人不知也積惡在身猶火之銷膏而人不見也非明庠情性察庠流俗者孰能知之此唐虞之所已得令名而桀紂之可爲悼懼者也夫善惡之相從如景鄉之應形聲也故桀紂暴謾讒賊並進賢知隱伏惡日顯國日亂晏然自己如日在天終陵夷而大壞夫暴逆不仁者非一日而亡也亦日漸至故桀紂雖亡道然猶享國十餘年此其寢微寢滅之道也冊曰三王之教所祖不同而皆有失或謂久而不易者道也意豈異哉臣聞夫樂而不亂復而不厭者謂之道道者萬世亡弊弊者道之失也先王之道必有偏而不起之處故政有眊而不行舉其偏者日補其弊而已矣三王之道所祖不同非其相反將日挾溢扶衰所遭之變然

也故孔子曰亡爲而治者其舜歟改正朔易服色曰順天命而已其餘盡循堯道何更爲哉故王者有改制之名亡變道之實然夏上忠殷上敬周上文者所繼之祿當用此也孔子曰殷因於夏禮所損益可知也周因於殷禮所損益可知也其或繼周者雖百世可知也此言百王之用曰此三者矣夏因於虞而獨不言所損益者其道如一而所上同也道之大原出于天天不變道亦不變是曰禹繼舜舜繼堯三聖相受而守一道亡救弊之政也故不言其所損益也繇是觀之繼治世者其道同繼亂世者其道變今漢繼大亂之後若宜少損周之文致用夏之忠者陛下有明惠嘉道愍世俗之靡薄悼王道之不昭故舉賢良方正之上論誼考問將欲興仁誼之休德明帝王之法制建太平之道也臣愚不肖述所聞誦所學道師之言塵能勿失

耳若迺論政事之得失察天下之息耗此大臣輔佐之職

三公九卿之任非臣仲舒所能及也然而臣竊有怪者此篇

未陳不奪民利器細百家二事非策所及而自發之夫古亦因策有悉之究之語也天人古今故首尾一義

之天下亦今之天下今之天下亦古之天下共是天下古

亦大治上下和睦習俗美盛不令而行不禁而止吏亡姦

邪民亡盜賊囹圄空虛德潤草木澤被四海鳳皇來集麒麟

來游呂古準今壹何不相逮之遠也安所繆鑿而陵夷

若是意者有所失於古之道與有所詭於天之理與試迹

之古返之於天黨可得見乎夫天亦有所分子予予之齒者

去其角傅其翼者兩其足是所受大者不得取小也古之

所予祿者不食於力不動於末是亦受大者不得取小與

天同意者也夫已受大又取小天不能足而況人庠此民

之所曰囂囂苦不足也身寵而載高位家溫而食厚祿因

乘富貴之資力呂與民爭利於下民安能如之哉是故衆
其奴婢多其牛羊廣其田宅博其產業畜其積委務此而
亡已呂迫蹙民民日削月朘淩已大窮富者奢侈溢貧
者窮急愁苦窮急愁苦而上不救則民不樂生民不樂生
尚不避死安能避罪此刑罰之所已蕃而姦邪不可勝者
也故受祿之家食祿而已不與民爭業然後利可均布而
民可家足此上天之理而亦太古之道天子之所宜法呂
爲制大夫之所當循呂爲行也故公儀子相魯之其家見
織帛怒而出其妻食於舍而茹葵慍而拔其葵曰吾已食
祿又奪園夫紅女利虐古之賢人君子在列位者皆如是
是故下高其行而從其教民化其廉而不貪鄙及至周室
之衰其卿大夫緩於誼而急於利亡推讓之風而有爭田
之訟故詩人疾而刺之曰節彼南山惟石巖巖赫赫師尹

民具爾瞻爾好誼則民鄉仁而俗善爾好利則民好邪而俗敗由是觀之天子大夫者下民之所視效遠方之所四面而內望也近者視而放之遠者望而效之豈可曰居賢人之位而爲庶人行哉夫皇皇求財利常恐乏匱者庶人之意也皇皇求仁義常恐不能化民者大夫之意也易曰負且乘致寇至乘車者君子之位也負擔者小人之事也此言居君子之位而爲庶人之行者其患禍必至也若居君子之位當君子之行則舍公儀休之相魯亡可爲者矣春秋大一統者天地之常經古今之通誼也今師異道人異論百家殊方指意不同是呂上亡呂持一統法制數變下不知所守臣愚以爲諸不在六藝之科孔子之術者皆絕其道勿使並進邪辟之說滅息然後統紀可一而法度可明民知所從矣

古文辭類纂二十一

合河蕭氏
刻釋家語